



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :



Tir Yimiyim



tir\_yimiyim



tir yimiyim

TAPAK 3

### Trump-i JFK, RFK aser MLK nunger tepsetba files ajak sayatsü tuyu

### PM Modi-i sen dollar 1 jenjangji rupee 100 kümdaktsütsü: Congress

VOL. XXII ISSUE NO. 101 (ADOK 101)

DIMAPUR KÜPTOKNÜ (SATURDAY)

AENJETI (JANUARY) 25, 2025

₹ 5.00

## Department-i Aolemba ken o jangjashitsür

**Dimapur, January 24, 2025 (TYO):** Wooden Furniture Cluster Toluvi nung Aolemba Longkumer ya contracts mesüra supplies nung shilem kecha mali saka pa ya iba mapatong nung beneficiary ka dang lir ta Industries & Commerce Advisor Hekani Jakhalu-i jangjashitsüogo. NSCN/GPRN (Khango-Hokato Vusshe)-i Aolemba dang Rs 50 lakh meshiba atema tebilemtsü abenba lemsatepdang Hekani-i iba osang metetdaksü.

State sorkari iba tebilemtsü onük senzüka yutsür ta jembibaji tiyazü kechiyong Industries & Commerce Department-i iba ken o angateteptsü atema police den tongtepretepdang, ta lai ashi.

"State sorkar aser Industries & Commerce Department-i entrepreneurs ajungkettsü atema inyaker anungji tsübuu malitsüla. Onoki parnok kümzüka ayutsü aser mapatongtem takok ngua inyaktetsüsa yaritsü" ta Hekani-isa ashi.

NSCN/GPRN-i project details meshiba den Aolemba dak tai tongloksüba atema Hekani-isa ashiba agi "government projects ajak ya public documents lir saka sorkari public tsüngdang dang langzutsü" ta lai ashi.

"Telok ajaki nüngdak maliba

nung meinprong masütsüla aser department-i shinga maak mesüdaktsü iba ken o timi angateteptsü merangdar. Ajisüaka meinprong manenra state sorkari tapet mapa inyaksü" ta Advisor Hekani-i nenshia metetdaksü.

MSME Ministry ketdangsürtem, NIDC chairman, aser Industries & Commerce Department director-i anir ketdangsürtemi tawa tu Aolemba den küleml CFC semdangogo aser sentong atonga aliba ama mapatong inyaka aoba nguogo ta laisa metetdaksü.

"Iba mapatong ya Centre sorkar senotsü agütsür aser iba nung Special Purpose Vehicle (SPV) aser state sorkari sen enoksemtsü lemsüka inyaker" ta Industries & Commerce director P Tokugha Sema-ia ashi.

Iba mapatong nung civil works renemogo aser kol teimba ka tongogo saka kar ano matong lir, ta paisa ashi.

"Mapatong tang teinyakdak ali nung kodaser Aolemba-i mapa kecha meinyak mesüra sen agiogo ta shitettsü? Pa ya national award angur nisung ka lir. CFC ya taküm March ita nung renemtsü akok" ta Tokugha-isa NSCN/GPRN ajanga tai tongloksüba anema ashi.

## Dimapur nung traffic khuret ajemtsü meranger

**Dimapur, January 24, 2025 (TYO):** Dimapur nung traffic timtem ajema kümdaktsütsü asoshi lenmang kar bushiteptsü atema January 24, 2025 nü DC Conference Hall nung senden ka menogo.

Iba senden nung mendenji Chief Secretary, Dr. J. Alam, IAS liasü aser District Administration, Commissioner of Police, urban planners, department balala den NHIDC nungi teshimtet nübotem aser ketdangsürtem aden.

Senden nung traffic timtem tuluba ajuruba, lenmang tajungba yanglushitsü aser traffic management inyakyimtem indang onüktem benoka lemsatep.

"Traffic timtem azüoktsü atema ajak yariteptsüla aser tanü Dimapur nung iba ya tebilemtsü

tulu ka kümogo. Asenoki inyakyim tasen kar tenzüksüla aser department tem tsüngda yaritepa urban transport system tajung ka amenoktsüla" ta Chief Secretary Alam-i ashi.

Senden nung gari lenmang ulushitsü, lenmang tasentem yanglutsü, gari anentsüba inyakyim akangshitsü aser public transport lenmangtem bushiteptsü jembitepa liasü.

Senden nungsa traffic management study ka asütsü aser smart traffic systems benoktsü lemsatep.

Senden amenba sülen Chief Secretary-i New Field check gate, Dimapur anasa Dimapur bypass to Kohima tesem semdanga liasü.

## Mokokchung ATM booth aika nung sen mali

**Mokokchung, January 24, 2025 (TYO):** Mokokchung town tesem aika nung ATM booth nung sen maitba aser machine shitak maliba indang osang balala angazüker.

Tanü Sewak Gate nung aliba ATM booth mapang talangka mapa meinyakba indang public kadi melpeleba iba osangbener den lemsatep.

"Joko mapang talangka Sewak Gate nung aliba ATM booth nung ya sen maliba ajanga nüburtem kanga timtemteper", ta pai iba ATM booth nung iba osangbener dang phone ashi.


Mokokchung nung Sewak Gate ya shishilembadak tongtibang tesem ka lir, iba tesem

anasa ATM booth ka dang saka joko mapang talangka sen mait dang asür, anungji, yangi sen yakta inokdaktsünür, ta paisa mepishia metetdaksü.

"ATM booth ji sen agizüksü atema ayuba lir, anungji, sen melira ATM booth ji kechi nüngdak? Machine raksadangbo aji balaka, saka mapang talangka sen meinoktsüba yabo bank puri kheni temulung magütsüba sayur, anungji, nübur nem service shitak agütsüdaktsünür", ta paisa shisem.

Yamaji ano MTBA complex nung aliba SBI e-corner nunga joko mapang talangka CDM kol raksar sen deposit mesütetba indang public kadi iba osangbener den lemsatepa liasü.

## CM Rio-i Chümoukedima nung Sammogooting Stadium lapoktsü



**Dimapur, January 24, 2025 (TYO):** Nagaland Chief Minister Neiphiu Rio-i Hokolbarnü Chümoukedima district nung Sammogooting Stadium lapoktsüogo.

"Iba mapa inyaktetba ya Nagaland state ajunga atema tongtipang lir. Chümoukedima district ya cosmopolitan ka lir aser state nung alir aser adena orr alir ajak asoshi maongkatem agütsür" ta CM Rio-i stadium lapoktsüdag ashi.

"Chümoukedima district putiotsü takar asoshi tetushi agüja Sammogooting tenüng agütsür. Kümtem süia arudang Chümoukedima ya tongti tesem ka kümogo aser tanübo Nagaland

nung alinük aser terenlok tesem tongti ka kümogo" ta pai ashi.

"Sammogooting stadium ya kiojen ka dang masü saka yimjung, terenlok aser tejakleni aoba maittsü ka lir. Sorkari district ajak nung ibala facilities agütsütsü meranger aser iba ajanga saisapongbaren ajungkettsü. Iba ama stadiums ajanga lokti akasodaktsütsü aser telongjem adokdaktsütsü aser Naga nunger renlokba aser longjemba nung yaritsü" ta CM Rio-i ashi.

"Dimapur nung multi-discipline sports complex atema Planning Commission, Government of India ajanga senotsü agüja liasü. Ajisüaka NITI Ayog tentetba sülen

Planning Commission agienogo aser senotsü maruba ajanga mapa inyakba nung tetsükdaktsü ajurua lir. Sorkari tanga lenmang kar bushitsü aser renemtetra facility ajak aliba sports complex tulutiba asütsü" ta paisa metetdaksü.

Iba sentong nung PHE Minister Jacob Zhimomi, Urban Development & Municipal Affairs Advisor Zaleo Rio aser Industries & Commerce Advisor Hekani Jakhalu nungeria o tatsütsü jembia liasü.

Sammogooting stadium lapoktsüba sülen Deputy Commissioner's team aser Town Council, Chumoukedima team tsüngda exhibition football match ka asaya aser DC team-i 2-1 agi takok angu.

Sammogooting stadium ya Rs. 9,51,51,766 endoka yanglu aser nisung 1000 amentsü gallery capacity lir. Iba stadium nungsa First Aid room aser gents & ladies Toilets (PwD friendly design) yanglua lir.

Stadium indang rostrum first floor nung nisung 70 amentsü akok aser ground floor nung players room, media room o pantry lir.

## US nung "deportation operation" tulutiba inyaker



**Washington, January 24, 2025 (Agencies):** Donald Trump-i US President inyaksü tenzükba sülen ketdangsürtemi ozüng alema arurtem mita aotsü tenzükogo.

Ketdangsürtemi ozüng alema arur nisung noklang aika puogo aser sorkar tasen kümteter anogo asemnü tsüngda parnok aika meyipa yokogo.

"US ketdangsürtemi ozüng alema arur nisung 538 puogo aser military aircraft ka amshia noklang aika meyipa yokogo" ta White House press secretary Karoline Leavitt-i ashi.

"Trump Administration-i ozün alema arur aser ozüng alema inyaksangshir nisung 538 puogo. Parnok rongnung kiralongrar ka, Tren de Aragua gang züngsem 4

aser tanur dak tashiyim agi shi nung medemer aika densema lir" ta Leavitt-i metetdaksü.

"Trump Administration-isa ozüng alema arur nisung noklang aika military aircraft ajanga meyipa yokogo. Putiotsü nung deportation operation tulutiba inyakdar. Nangzükogo aser nangzükba ama inyaker" ta lai ashi.

Trump administration-i linük arrtsü kümzüka ayutsü atema mapa inyakdar ta White House-isa metetdaksü.

January 20 nü President inyaksü tezüngzüktep agiba sülen US President Donald Trump-i executive orders aika nung sign süa liasü. Item rongnung kaji "Protecting the American people against invasion" order lir.

Tesüba küm pezü tsüngda US telungi ozüng alema arur nisung million aika ait. Parnok commercial flights nung indangindanga United States-i arudaktsü aser American lokti den lidaktsü, iba ya Federal laws alema lir" ta executive order nung shia lir.

"United States nung ozüng alema arua alirtem ajanga national security aser public safety asoshi lendong bentsür arutsü. Parnoki tai maketba America nunger dak tesempatsü mapatem inyaksü" ta government order nungsa shia lir.

January 23, 2025 nü US Congress-i GOP-led bill - Laken Riley Act atema temelaba agüja liasü. Iba bill ya ozüng alema arurtem aputsü aser meyipa yoktsü atema lir.



## Raj Bhavan Kohima nung Uttar Pradesh State Foundation Day amung



Raj Bhavan Kohima nung Uttar Pradesh State Foundation Day amungba sentong nung tangokba noksa angur.

**Dimapur, Aenjeti/January 24 (TYO):** Raj Bhavan, Kohima nung January 24, 2025 nü Uttar Pradesh indang State Foundation Day munga liasü.

Iba sentong nung Nagaland Ang La Ganesan-i jembidang, "Tanü asenok Raj Bhavan, Kohima nung tejak tenteta tepela nung adenshia aliba ya state ka indang foundation day benjongtsü atema kisung masü saka Nagaland nung aliba nüburtem aser Uttar Pradesh nungi arua alirtem tsungta tesendaktep tajung benjongtsü asoshi lir," ta ashi.

Iba benjongmung nükjidong ya iba tesendaktep tashi itshitsü aser asen linük sobaliba taktepa aliba tajungba kumdakja sobaliba balala angateta akumtsübotsü asoshi lir. Iba amala sentong nung asenoki India indang "Unity in diversity" tali jangjar, ta pai ashi.

Uttar Pradesh ya sobaliba aser tamangba yimsü puti otsü nung takar state ka lir aser "Heartland of India" ta jembir.

Iba state nungi alimai süngmanga agizüksüsa classical Kathak dance amala sobaliba tajung sayur, Banarasi silk aser Lucknowi chikankari embroidery amala yanglur.

Tanüla tsütsü iba state ya nungtugu lir, kong Varanasi, Prayagraj, Ayodhya, Sarnath aser Khushinagar amala tejangja tesemtem lir. Item tesemtemi alima tesem balala nungi temeshi ainlen jajar million aika aruba den tamangba yimsü, tesendaktep nung lungjemdaksür, ta Nagaland Angh-i ashi.

Naga nungeri Uttar Pradesh nungi arur dang temeim agi "Desh wale" ta ajar, tetetzü parnok aruba tesem indang kisung masü saka pei tasoli den sendaktepba temeim sayur, ta pai ashi.

Ibai kati ka akumtsüboba aser angatetba temaisü aser Uttar Pradesh nungi arur temi Nagaland nung shilem tajung agiba jenti lir.

Parnoki shishilempaba aser

kisü-jensü nung par sempet tajung sayur, entrepreneurship tanüla aser temlungtetba ajanga Nagaland ainba aser tejakleni aoba nung kanga yarir, ta Angh La Ganesan-i ashi.

UP nungi Nagaland nung arua alirtemi state ana tsungta apular shilem agir aser tarutsü nunga telungjem nung kati ka den yaritepa aser angatettepa alitsü imlar ta ashi.

Sentong nung Manoj Maddheshi aser Jagdamba Mall natia Uttar Pradesh indang o tatsütsü jembia liasü.

Iba sentong nung UP nungi Anupurna Gupta ajanga Bhakti Nritya, Riya Gupta ajanga Prem Nritya, Alisha aser medemer temi telok tsüngsang, K.P Gupta ajanga Bhajan, Harshita Maddheshia-i Kathak Nritya on Mahabharata amala agi lokti ayongzüka liasü.

Commissioner & Secretary to Governor, Rajesh Soundararajan-i pela agizükba o jembia aser Section Officer Jochule-i melepzung o jembia liasü.

## CM Rio-i Rev. K. Luroo asükhü lemsatep

**Dimapur, Aenjeti/January 24 (TYO):** Taoba mapang State Chaplain inyaka alisang Rev. K. Luroo, January 24, 2025 nü CIHSR, Chümoukedima nung asüba osang angashia jashir, ta Nagaland Chief Minister Neiphiu Rio-i sangdong ka ajanga ashi.

Tsüngremlar Rev. Luroo ya NBCC nunga Education Secretary aser CBCC indang Executive Secretary inyakdangogo. Pa State Chaplain ama inyakdang küna kanga junga metettep aser pai Tsüngremer wadang nung temeim agi bendanga agütsür inyakba ni ajitetogo, ta ashi.

Pai Naga nunger tsungta telungjem aser temeimtep nung alitsü asoshi anibelem mesasai jembia nokdak. Pa State

Chaplain ka ama bendanga agütsür inyakdang legislators nem tanüla chiyongtsü agütsüba teti bilemtetsü.

Pa asüba ya Naga nunger aser talisa Chakhesang kin asoshi takoksa tulu lir. Ajisüaka pa takum aser wadang asoshi asenoki Tsüngrem nem tenüngsang agütsüti.

Pa mapa tajung ajanga pa meteta alir ajunga ajungmesotsü imlar, ta CM Rio ajanga ashi.

Tang mangyimba mapang state sorkar tenüng nung mangyimer kibong den asükhü lemsateper aser Tulusang Tsüngremi parnok nem tashi agüjang ta sarasademtsür. Asür tanüla teti tesunep nung anisungzükjangma, ta CM Rio ajangasa ashi.

## Mangkolemba Town Council atema shimer tenangzüktep agi

**Dimapur, Aenjeti/January 24 (TYO):** Mangkolemba Town Council nung züngsem asütsü shimba (nominate) nisung asem ADC Mangkolemba aser Executive Officer, Moakumzuk Tzudi ajanga ADC Office, Mangkolemba nung January 24, 2025 nü tenangzüktep agia

liasü. Züngsem tasen asem ya Jungshilemba, Imtinungba aser Imkongtoshi alitsü aser ajak agi Mangkolemba Town Council nung züngsem 12 akumer aser parnok rongnung züngsem toku election ajanga shim asem nominate asü.

## Niuland nung BBBP küm 10 ajungba mungogo

**Dimapur, Aenjeti/January 24 (TYO):** Beti Bachao Beti Padhao (BBBP) Scheme küm ter ajungba nungtem nung Niuland District Administration ajanga Social Welfare Department den lungjemer sentong ka January 22, 2025 nü Deputy Commissioner, Niuland indang Conference Hall nung ayongzüka liasü.

Iba sentong nung Deputy Commissioner, Niuland, Sara S Jamir-i tayongzüka o jembia aser iba sülen tezüngzüktep aser signature campaign agia liasü.

DPOI/C, Sentimenla

Pongener-i BBBP indang metetpela liasü. Iba inyakyim ya March 8, 2025 tashi agia school, tetsür telok aser tesem balala nungi ketdangsürtem nem shilem agidaktsütsü0.

Linük nung tetsür-tebur bendanga amshiba tebilemstü samadaktsütsü aser tetsür nem tashi agütsütsü nükjidong nung BBBP Scheme ya Government of India-i 2015 nung tenzüka liasü.

BBBP scheme nükjidong ya nüburtem gender bias anema shisatsü agütsütsü aser tetsür nem teyari balala tajungba nung agütsütsü asoshi lir.

## DDDC Dimapur ajanga temesepba mozü jenti raksaa indok

**Dimapur, Aenjeti/January 24 (TYO):** NDPS Act, 1985 nung ajemdaker Chief Judicial Magistrate, Dimapur temelaba nung temesepba mozü jenti raksaa indoka liasü.

Commissioner of Police indang report ajanga ashiba agi, NDPS kübok police stations trok nung ken o 79 zülüoka liasü.

District Drug Disposal Committee Dimapu nungya Commissioner of Police, Dimapur tekolak lir, kong SP (Crime); Dimapur, Chümoukedima aser Niuland indang DCP tem züngsem lir aser parnoki December 4, 2024 nü Prosecuting Inspector Court Office, Dimapur nung oa item temesepba ozü jangatepa liasü,

ta sangdong ka ajanga ashi. Iba sülen Commissioner of Police aser district asem nungi district administration tem lia DMC dumping ground, Burma Camp nung temesepba mozü ya raksaa indok.

Parnoki raksaa indokba temesepba mozü ya sen 34, 82, 87,425 jenjang liasü.

Temesepba mozü tem ya brown sugar, sunflower aser heroin tuozük seret 9 ser grams 741.15, SP capsules/Nitrosen tablets tejang 16,537, Crystal Meth tuozük seret pongu, opium tuozük seret ana ser grams 450, cough syrup bottles 17,269, opium straw tuozük seret 2600 aser WY tablets/Simplex-e süngjang 1,34,203 liasü, ta sangdong ajangasa ashi.

## Classroom alema oa shisatsü bushitsüla: Advisor Tovihoto Ayemi



Kuhuboto Town nung Western Sumi Students' Union pur 41 buba Biennial Conference tembangba sentong nung H. Tovihoto Ayemi-i jembiba noksa nung angur

**Dimapur, Aenjeti/January 24 (TYO):** MLA & Advisor, Tribal Affairs and Election Department, H. Tovihoto Ayemi-i lanurtem dang lokti nung temelenshi tajung bener arutsü asoshi bendanga agütsür meima inyaksü ayongzüka aser lanurtem ya asung atema lenir dang masü saka tanü lokti nunga temelenshi bener aruba nung tongti shilem agir lir ta ashi.

Brehostibar nikongdang Kuhuboto Town nung Western

Sumi Students' Union pur 41 buba Biennial Conference tembangba sentong nung pai iba o ya ashi.

Lenmang balala nung kija ajangzüksü asoshi tangazükba tajung aika bener aotsü atema kaketshir asoshi iba sapang ya kanga tajung lir, anungji pei asoshi aser lokti asoshi tajungtiba nung shilem agitsüla, ta pai kaketshirtem ayongzüka.

WSSU ya kaketshirtem aser nüburtem asoshi lir, anungji

kaketshir temi pei mangdang angateta tarutsü asoshi bilema inyaksüla, ta pai ashi.

Tetoktepa jenti lir aser alima tesüngmangtsüka melenshia aor, anungji 'self-enterprising' ya ajak asoshi nungdaka kumogo, sadok-sayima aliba nungi ayazüka oa classroom alema oa shisatsü bushitsüla, aser pei sasa renemshitsüla, aser sorkar mapa kisung nung metaloka aliba agi na meyaritsü, ta Advisor Tovihoto-isa ashi.



# PM Modi-i sen dollar 1 jenjangji rupee 100 kümdaktsütsü: Congress



**New Delhi, January 24 (Agencies):** India nung sen 'rupee' jenjang mejungi akümba atema Ato kilonser Narendra Modi aija Hokolbarnü Congress-i, tesüiba küm 10 tsüingda India nung sen jenjang shilem 50 agi mejungi kümogo; Ato kilonseri US dollar sen 1 ji India nung sen century ka (100) kümdaktsütsü telemtetba agir ama reprangteter, ta aitsü.

Osangbenertem den jembidang Congress otongdar, Supriya Shrinete-i, "Rupee jenjang tamajungba akümba denji külemi Ato kilonser akhümket aser office jenjang-a tamajungba akümer, ta jembisangji Modi liasü. Tangbo Ato kilonser Modi-i kechi jembitsü, ta ni bilemer," ta metetdaksü.

All India Congress Committee (AICC) office nung osangbenertem den jembidang laisa, "Tanübo dollar 1 ji rupee

87 shi lir. Modi Ato kilonser akümba mapang nung dollar 1 ji rupee 58 liasü. Dollar den medemdangra rupee jenjang 29 ajema kümogo, aser ibaji tesüiba küm 10 tsüingda shilem 50 agi tajemba akümba lir. Pai century ka (100) jungdaktsütsü telemtetba agir ama reprangteter," ta ashi.

Laisa, rupee asentenshidaktsütsü atema Centre sentong ali asü?, ta asüingdang.

"Tanübo rupee-i 87 nung atsükshishi asayar. Rupee jena oadoker ama reprangteter aser Ato kilonser Modi-i tesülen nungi -- "Tangbo 60 dak tali, 65 dak tali, 70 dak tali, 75 dak tali, 80 dak tali, 85 dak tali" ta ayimdenner. Tangbo asenoki 87 dak tali kümdaktsütsü. Narendra Modi-i rupee century kümütsütsü atema telemtetba agiogo," ta lai ashi.

"Narendra Modi dang rupee jenjang tamajungba akümba

atema asüingdangra pai iba atemaji (mezüing Ato kilonser Jawaharlal) Nehru nem tai tongloktütsü," ta lai ashi.

Shrinete-isa India nung tesüiba mapang Ato kilonser balala kübok rupee jenjang tamajungba akümba 'pie chart' ka sayu.

British nungertemi India toktsür oadoker mapang nung US dollar 1 ji India nung sen 3.31 liasü aser Nehru kübok küm 17 tsüingda rupee jenjang ajembaji shilem 2 dang liasü, ta lai ashi.

"Lal Bahadur Shastri-i aniba sorkar mapang nung rupee jenjang malu. Indira Gandhi mezüing Ato kilonser inyadkang rupee jenjang ajembaji shilem 5 liasü. La tanaben Ato kilonser inyadkang rupee jenjang shilem 5 ajem. Rajiv Gandhi mapang nung rupee jenjang ajembaji shilem 6 liasü. VP Singh küm ka Ato kilonser inyadkang rupee jenjang shilem 6 ajem. P V Narasimha Rao mapang shilem 17 ajem," ta lai metetdaksü.

"2004 küm Dr. Manmohan Singh Ato kilonser akümba mapang nung dollar 1 ji rupee 45 liasü saka pai rupee jenjang tajungba kümdakja 41 aküm," ta lai ashi.

Dollar 1 ji rupee 58.4 aliba mapang nung Modi Ato kilonser aküm, ajisüaka pai century ka (rupee 100) kümdaktsütsü meranger, ta Shrinete-i aitsü.

# Waqf Amendment Bill JPC nung opposition MP 10 anentsü

**New Delhi, Aenjeti/January 24 (Agencies):** Waqf Amendment Bill reprangshitsü atema tentetba Joint Parliamentary Panel (JPC) Hokolbarnü senden amenba mapang nung mangatettep adokba sülen iba Panel nung opposition MP ter anogo ka atema anentsü.

Senden nung JPC Chairman, Jagdambika Pal-i pa sünütsü asür aser sorkar tetuyuba kübok pai inyaker, ta shia opposition MP temi pa anema ola adoka liasü.

Ano külen Chairman Pal-ia, Trinamool Congress lenir, Kalyan Banerjee-i pa anema tashishitsü o jembir, ta ashi.

Senden nungji BJP züingsem, Nishikant Dubey-i JPC nung opposition züingsem anentsütsü atema benokba sülen opposition züingsem 10 anentsü. JPC nungi anogo ka atema anentsüba MP temji- Trinamool Congress nungi Kalyan Banerjee aser Nadeem-ul Haque na, Congress nungi Mohammad Jawed, Imran Masood aser Syed Naseer Hussain nung, DMK nungi A Raja aser Mohamed Abdullah na, AIMIM nungi Asaduddin Owaisi, Samajwadi Party nungi Mohibullah aser Shiv Sena UBT nungi Arvind Sawant nung lir.

Kashmir nung yimsü lenir Mirwaiz Umar Farooq leniba nung J&K nungi telok kati Waqf Amendment Bill committee ajurua iba bill dak sendakba nung parnok tebilemtsü onük kar lemsateptsü atema aruba anogo nung ya atalok.

TMC lenir, Kalyan Banerjee-i, "January 21 nü onok senden amenba sülen chairman-i

züingsemtem dang taruba sendenji January 24-25 anogotem nung amentsü ta metetdakja liasü. Opposition züingsemtemi ibaji anema longkak ait aser A Raja-ia shidi ka ajanga sendenji January 30 mesüra 31 nü ang ayongzüikang ta mepishia liasü. Ajisüaka Chairman-i onoki mepishibaji magizük," ta metetdaksü.

Paisa, Hokolbarnü senden atema onükji Brihostibar ayaterm nung melenshi aser ayaterm nung ang züingsemtem nem iba osangji metetdakja liasü, ta ashi.

"Chairman-i opposition züingsemtemji kidang yaritepa alirtem ama züingshir aser tetuyuba dang agütsür. Delhi nung assembly election agitsü aliba nung rangloker senden aritepa agitsü meranger," ta paisa metetdaksü.

Trinamool Congress lenirisa, senden tagidak mapang nung Pal-i phone call kar agizüka liasü, aser ibaji sorkar nungi tetuyuba aruba lir, ta tai tongloktütsü. Osang angazükba agi, JPC-i January 29 nü tatembangbuba report renemtsü.

Yaküm Lok Sabha nung Union Minority Affairs Minister Kiren Rijiju-i Waqf (Amendment) Bill benokba sülen iba bill reprangshitsü atema August 8, 2024 nü Joint Parliamentary Committee (JPC) nem nungloktja liasü.

Iba bill ya Waqf Act, 1995 yanglushitsü atema lir.

Osangbenertem den jembidang Mirwaiz-i, "Ni iba bill ya anemer. Yimsü dak sendakba onüktem nung sorkari mejangjongtsüla," ta ashi.

# Delhi election: MCC alema inyakba ken o 570 benokogo

**New Delhi, January 24 (Agencies):** Delhi nung assembly election agitsü mapang ana nung lia tang tashi nung Model Code of Conduct (MCC) alema inyakba ken o 570 benokogo, ta Hokolbarnü ketdangsertemi metetdaksü.

Item ken oji MCC benokba anogo January 7 nungi January 23 tashi nung benokba ken otem lir. Item ken o aser Excise Act dak sendakba nung nisung

19,065 puogo.

February 5 nü Delhi nung assembly election agitsü lia police-i arrtsülen aliba checkpoints nung sashia mita reprangba den külemi prangpong, yi aser temesepba mozü shibelenba anema mita aoer, ta ketdangsertemi metetdaksü.

Delhi Police-i MCC kübok ken o 577 benokogo aser ozüing alema amshiba prangpong 284 aser cartridges 394 puogo.

Delhi police-isa sen crore 1.3 jenjang yi litre 46,682, sen crore 20 shi jenjang temesepba mozü seret 119.51 aser ozüing ajanga nokdangba injection 1,200 puogo.

Ozüing benokba agency temisa sen crore 5.29 aser taribi seret 37.39 puogo.

Delhi nung Assembly menden 70 atema February 5 nü election agitsü aser February 8 nü vote azüingtsü.



Milkipur nung by election agitsü mapang ana nung lia January 24, 2025 nü Ayodhya nung Uttar Pradesh Chief Minister, Yogi Adityanath-i election nüboyim sentong ka nung adenba noksa nung angur.



January 24, 2025 nü New Delhi nung Delhi Chief Minister aser AAP lenir, Atishi-i Delhi assembly election atema nüboyima Navjeevan Camp semdangba mapang tangokba noksa nung angur.

# Factory chirepba lendong nung 8 asü

**Mumbai, January 24 (Agencies):** Maharashtra kübok Bhandara nung aliba ordnance factory nung langka sashia apokba ajanga kilen chirepba lendong nung nisung 8 süogo, ta Union Minister, Nitin Gadkari-i metetdaksü.

Iba jakdang osangbener den jembidang District Collector Sanjay Kolte-i, factory chirepba jana agi nisung 8-9 shi anenbanga lir, ta metetdakja liasü.

Union Minister Gadkari-i, "Mezüing bushisüandanga apibo iba lendong nung nisung tenet

yiruogo," ta metetdaksü.

Osangbener den jembidang District collector Sanjay Kolte-i, Hokolbarnep 10:30 ako meta Jawahar Nagar area nung aliba factory indang LTP section nung iba lendong atalok, ta ashi.

Chief Minister, Devendra Fadnavis-i X ajanga, "Iba lendong nungi nisung pongu kümzüik. District collector aser superintendent of police na iba tesem nungji lir aser Nagpur nungi state disaster response force (SDRF) team ka iba tesem jagi yokogo," ta metetdaksü.





## TIR YIMYIM YIMOBILEM (EDITORIAL)

DIMAPUR KÜPTOKNÜ, JANUARY (AENJETI) 25, 2025

### Mokokchung atema lenmang

**K**ohima aser Dimapur district nung malirtemi Nagaland nung tanga district-tem merenlokyonga Dimapur aser Kohima-bo sentsüwangshia renloker asütsü amai bilemer aser aji tebilemla bilemer, kechiyong Nagaland governor aser Chief ministeri anir yimten yimsüsür aser tulurtem ajak Kohima aser Dimapur nung alir, anungji item yimti anajibo parnok anogo shia süidak asünungji department-temi parnok nüken tsübuwa terenlok mapatem shitak inyakdar asütsü amai bilema alitsü. Ajisüaka, tebilemba ama masü, Smart City asütsü atema asenokia meteta sen paikato Kohima asoshi dang endokbato agi Kohima kecha balaka topur junga yangluba mangur aser tanga district-tem dang nungi Kohima kecha balaka smart küma yanglutetba memeteter aser mereprangteter. Kasaji, Dimapur yimti yimdonga taoba 20th century nung aliba dang nungi tang alima aso tasenba nung tamajungba kümogo. Aji oda, taoba putu nung yanglua toktsüba apu, overbridge ana, ka dang yanglushidagi aser tanga apu kajia merüka meyutet lisem aser anakawa agi dang sünga nangbangogo. Ajisüaka, Kohima aser Dimapur asoshi senzusenpongtsü, shishilembatsü aser khu bener yoktsü aser arutsü asoshi tebilemtsü kangbo mali, kechiyong lenmang majungyonga garibo senzüteta lir aser talisa Dimapur-bo lenden lima aser Assam den artsüsa alinungji talir aser tayoker ajak melamelaa oli aruli senzüteter. Iba jagi, talisa, shishilembaba mapa nung Dimapur nung alirtem aikati pei pei yari shishilembaba mapa inyakteter. Item ama kasa tajangzük aser temoatsüji asenok Mokokchung alirtemia agitettsüsa Mokokchung district meketa gari lenmang danga junga alitsüba kanga rongdak nungdak mapa ka kümogo. Joko, asenok Mokokchung district-a tangar district-tem dang nungi tajungba renloknüra, gari lenmang yanglutsü asoshi bilemdang pei yimer lushi mesüra pei yim atongtsüba lenmang dang masü saka Mokokchung district nung aliba yimtsüng ajak gari lenmang tajung agi sentakteptsü bilema inyaksüla. Aji oda, talisa lenmang tongtibang ana, Mariani-Mokokchung aser Amguri- Mokokchung lenmang ana ya teti junga alitsüla aser lenmang ana den ya yimtsüng ajak lenmang tajung agi sentapteptsüla. Kena, tajung kaji, tangbo Asetkong-Tsüngsangra lenmang yanglutetba agi Tuli nungi Impur tashi nung yimtsüng ishikabo gari lenmang agi kanga junga sentaktepdaktsüogo. Iba amaji kodang gari lenmang agidanga asenok yimtsüng ajak ya kanga junga sentaktepa yutsüdir, asenok o tangar bendanger lima na tsüngda shishilembaba mapa melamelaa tenzüksü aser asen li nung akaba ajak tagitsü rongsen akümtsü. Atangji, lenmang denji kanga nungdakbaji electric light ya lir, anungji kodang gari lenmang lidir tzü nungi adokba hydro-electricity-sa mesüaka anü nungi atsüzüka agiba Solar power agi asenok nungdakbo inyaktettsüsa bener arutettsü. Tanü asenok rongsenren nung renloknüseta merenloktetba tebilemtsü aser asenok dak aketba tashimait kaji, asenok ajaki pei yimtsüng asoshi dang bilemer, anungji yimsüsüria pei yimtsüng dak alema tanga nungbo gari lenmang yanglutsüba nungdak mangur aser light-a tangar yimtakbo menüngdak amai bilemer. Ajisüaka, asen yim telongtet kija nung dang gari lenmang aliba agi asenok tangar den külemi shishilembaba mapa inyaka merenloktettsü. Tanübo yimtsüng ta asüba ya asen tsürabur yimtsüng indang jembir masü saka alima ajunga ya yimtsüng ka akümba indang jembir, anungji Mokokchung district nung kodang asenoki ozü yim ta kodang jembidir, ibaji Mokokchung district ajunga indang jembir ta asenoki bilema inyaksüla. Kasaji, aluyimba indang jembidanga mesüra nübertem nem parnok tajangzük ngua inyaka alitsü asoshi mapa indang jembidanga, asenoki ozü yim ta jembibaji asen tsürabur yimtsüng indang jembirba masü saka Mokokchung district ajunga yim ka kümer jembir ta asenok dak tangatetba alitsüla. Aji oda, kodang asenoki Mokokchung district ajunga ya yimtsüng ka kümdaktsür jembidir, memeteti Mokokchung district nungsa mozü kia tajungba aser kaketrejua tajungba kümer alitsü. Idangjibo, train station agia Mokokchung tonger alitsü aser Mokokchung district-ang Nagaland yimtiba ama teti mazüngi aliba yimti ka kümadoktsü.

## OLEMSABANG

### AROGO SAKSALEMTSÜ YIMYIM

- Meyu Changkiri

(Yashi adok nungi...)

Khrista nem bendanga agütsüba kanga dang tongtipang. Rom 10:9 nung sangdong ama, Kechiaser nai ne tebang agi Yisuji Khrista ta nangzükra, aser ne temulung nung Tsüngremi pa tasü nungi shia arudaktsü ta amangra, na kümzüksü. Khrista dak chichiba tamang yutetba ajanga taküm ka melenshidaktsür. Iba jagi Khrista dang tashi angatsü len sayur. Taküm nung tanela temelenshi majangshi Tsüngrem tenzükba ajanga tiazü tamang adokdaktsür. Tsüngrem tenzükba mapa nung Pa sentsüwangshia melira, metenzük tajungba. Ibala tenzükba jagi Tsüngrem sentsüwangshitsü melena maksü bener arur. Arogotem nung Khrista den kija taküm tesendaktep, temenen tatok bushitetba, tamang nung tashi ita nokdakba, aser metitemi tanela tashi ita aintsü ajungshitsüla. Tsüngrem O sayuba, sarasadem taküm, aser Temeshi Laishiba tesayuba nung anidaktsü arogotemi züngzünga sayutsüla. Tanela nung teintet aser tashi ita alirtemi temeim agi tashi maitba adianutem yaritsüla. Parnok dang len sayua shisatsü tajung agi anepalutsü iba ya ajanga tangatetba agütsür.

Pei tangatetba aser kin kidong sobaliba ayak dak masü saka Khrista dak Khristan telungjemji amenoktsüla. Tenyar Paul ajanga Efesa 4:3 nung ayongzükba ama, Tanela telungjem wazüka yutettsü asoshi tesünep ajanga alentepdaktsütsü. Iba telungjem nung ajemaluba, tatok agütsüba, aser külem nükjidong ka akatsü akanger. Inyakyim aser sobaliba balala dang nungi Khrista temang nung temeim agi kati ka tenzükba kanga tongtipangba lir. Telemsa nungi pilaa alitsü asoshi tatok agütsüba, putepshiba, aser Osang Tajung ajanga longjemdaktsüba kanga nungdaker.

Temeshi Laishiba nung lenirtem dak alitsüba jakla dak azütsüla. Tsüngrem aser arogo lokti tsüngdang lenirtem ochi nung alitsüla. Jembishinu nung teyakyak aser aika den metetepa aliba dang nungi jakla yimya tajung aser tajaba tejangja metetba taküm asütsüla. Temulung lemteta inyakba, ajemaluba, aser Tsüngremer Ochi dak azüita litetba ajanga tanidakertemi metsüreni anidakteter.

#### Amangbapur Shia Teinyaktsü Shilem

Arogoji tenük agi anguba tenla ki ya masü; iba ya amangbapur lokteper akümba Khrista temang. Amangbapur taküm nung tanela temelenshibaji kija taküm nungi tenzükba. Amangbapur taküm shia meshitetba, aser Tsüngrem den tesendaktep tajung yanglushiba ajanga tanela nung asentenshi adokdaktsür. 2 Putipuyang 7:14 nung ajemalua temulung meyiptsü tajaba ka angur, kü nübur shirnok kü tenüng agi ja-a, lir parnok sasa ajemaludi süra, aser sarasademra, aser kü tejak bushira, aser parnok lenmang tamajung nungi meyipra, idangji ni kotak nungi angashitsü, aser parnok temenen atoktsü, aser parnok lima anebtsütsü. Revival ya arogoi atemzüka agiba sentong ka masü saka sarasadem aser tanela nung bendanga agütsüba amangbapurtemi jangrudaktsüba tanelar maparen ka lir.

Asentenshi adoktsü asoshi asen tashi mait aser tamakok Tsüngrem tsüngdang nangzükba kanga mezüng mera. Pei tai nangzükba aser temulung meyipba ajanga temelenshi tajung bener arur. Tanela nung tashi ita aintsü asoshi Tsüngremi molungba ama Pa O nung tera yanga alitsü, aser Pai molungba ama jajatsü nungdaker.

#### O Tempang

Arogoji Yisu Khrista meyong. Khristai yamai ashi, Aser ni ne dang shidi, "Na Peter aser iba lung manung ni kü arogo yangertsü; aser tasüba; aintemi ibaji makoktsü. (Mati 16:18). Pa tamendakdak atangji. Pa Kibuba kümdaktsüba ajanga teti asoshi temelenshi tenzükba. Amangbapur aibelenbaji tanga masü saka shidakba tamendakdak nungi pila aoba ajanga lir.

Tarutsü arogo tiaji amangbapur kija taküm shia Temeshi Laishiba tesayuba nung jajaba, chichiba tamang nung tashi ita ainba, aser ajemalua Tsüngrem tenzükba jagi sayutsü. Item tayongzükba nung asenok nokdakti. Joko asenok Kangki dangi meyipdi. Tsüngrem sentsüwangshidakja arogo yangerba nung shilem agidi. Khristantem ajaki ochi, telungjem, aser temeim nung shilem tajung agitsü taküm bendanga agütsüdi. Joko zübazülema alitsü mapang suiadokogogo. Tongpangji Kibuba meyong, saka yanglushitsü mapaji asenok teinyaktsü mapa. Tanü nü sasa asüngdang: Ni kong yanglushitsü nungdaka lir? Ozü arogo longjemba aser temeim mapa nung ni kechi shilem agitettsü? Tamang aser taremsük nung anogo shia Khrista den jajadi.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir**



# KCC Manipur Synod mungdang tembangogo



Songlei Mongbung, Saikul Sub-Division nung Kuki Christian Church (KCC) Manipur Synod 46buba mungdang amongdang tangokba noksa nung angur.

**January 24, 2025:** January 20, 2025 nü Songlei Mongbung, Saikul Sub-Division nung Kuki Christian Church (KCC) Manipur Synod 46buba mungdang tembangogo.

Tang Manipur nung tensa mejungi aliba mapang ka nung iba mungdang ayongzüka agi.

Anogo pezünü mungdang ya January 17, 2025 nü tenzüka liasü.

Anitet 17:15 Lai tekong nungi "The Lord Is My Banner" omen nung ajemdaker ayongzüka mungdang nung Arogo lenir 170 aden.

Sentong ayongzükertemi ashiba agi, state nung loktiliba-yimtenren tsütsü makmakshishi aliba mapang ka nung aser Kuki nungertemi timtem aika ajangshiba mapang ka nung iba mungdang ya tanela tsütsü tejenokdak sentong ka mestüka liasü.

Mungdang nung adenertemi bendanga agüja sarasadem, Kuki nungertem atema Tsüngrem dang nungi Pa leniba

aser teküzmükba meshia sarasadem. Lenirtemisa Kuki nung lenirtem atema bendanga agüja sarasadema liasü.

Kasa sentong nung mungdang nung adenertemi pastor mapa nungi anisüngzüker pastor ter den tepila sentong agi. Pastor tem jagi küm 40 dak tali tenzüka aruogo.

Parnoki tamang jenjang manokshii Tsüngrem tenzüka ya Arogo aser loktiliba atema tatishitsü tajung, ta shia parnok nem tetushi agütsü.

Kasa sentong nungsa Sunday school tatidang aser Synod tatidang balala nung tangar dang nungi alakteta takok angurtem nem tetushi agüja liasü.

Mungdang nungsa pastor tasen pezü- Letgoulen Khongsai, Lamgoulen Khongsai, Jamkholal Lupho aser Joyful Khongsai nung 'ordain' asü. Iba ya ajanga Arogo maneni ainba aser asüngsashiba temaitsü sayur, ta

sentong ayongzükertemi metetdaksü.

Arogo nung lenirtemi tayongzükbatem koktetsü aser telongjem alitsü atema lokti ayongzüka liasü. Mungdang nung o jembirtem rongnung KCC Manipur Synod Executive Secretary Dr T. Lunkim, Assistant Executive Secretary Dr S. Chongloi, Moderator Rev. J. Lunkim, aser Assistant Moderator Thangkholam Chongloi nung liasü.

Parnoki mungdang omen nung ajemdaker jembi. Parnokisa timtem mapang nung longjema alitsü aser maneni sarasademtsüji kanga tongtibang, ta ajangshia liasü.

Arogo lenir kati, "Iba mungdang ya ajanga Kuki nung tamang jenjang manokshiba kuli sayur. Timtem mapang nung iba ama mungdang ayongzüka aliba ajanga telongjem adokdaksür aser tanela tsütsü tashi angur," ta metetdaksü.

Kangpokpi District nung ayongzüka sentong tatembangbuba nung Kuki Khristan lenirtemi asentenshir nübür tenzüksü aser tesünap nung alitsü atema bangjema liasü.

Arogo lenirtemisa, KCC-i maneni Kuki nübürtem dang tanela tsütsü lenmang sayutsü, ta metetdaksü.

Iba mungdang nung adenertemi tashi tasen den teimla tasen angu aser mangdang yur Kuki nung longjema alitsü atema inyaksü bangjemogo.

# ANOGO ABEN TSÜNGREM DEN

## TANELA TEJANG AKABA KHRISTAN

*"Saka Tanela tejang itemi: temeim, tepela, tesinep taremzü, kümlü tajung, tejungnü, temulung lemuerba taremaluba, pei sasa azükba, ale nema tanga oling kecha mali". Galatia 5:22-23*

Paul ta Khristan mezüng putu (Christian era), mapang nungi tand putu tashi nung asenoki züngshir. Paul Yihuda nung aser parnok tamangha Khristan missionary tulutibaji ozüng nung dang amendaker metsünga reta benshi asr amanga liasü, ano maneni item ozüngtem indang pai aiben jembi.

Paul-I Galatia nung dang ozüng ajak dang nungi tanela tejangtem ya temaba aser tuluba ta jembi aser tanela tejangtem ya tamanger ajaki benshitsüla ta zülü. Pauli shinübaji tamanger shiba Khrista aka pa/la dak tanela tejang ajak keta alir. Aser iba jagi pa/la takum liba liro ajak azüoka lidaktsür. Tanela nung jajabaji Yisu Khrista den jajaba den saku lir ta zülü. Tanela jaklaliro sobutsü aser anogoshia amshibaji Khrista jaklaliro lir.

Asenoki aika jembiyonga aser tamangera ta ashiyonga tanela akaba taküm ka mesüra kibong nung apuani tsüngta shitakba temeim malitsü. Kibong nung tesünap malitsü. Chirmur-ia Yisu temeim aser jakla ya mayu tashi kodanga tsürabur pela- a meyutet. Tsürabur meyaritetsü, tsürabur aser chirnur tesendaktep kodanga tajung malitsü. Ni asenok ajak dang asüngdangnübaji, Khristan kibong kong nokdaka lir. Aki- alemli shin o ka lir, "tsüngsangera majitet aser sotsi-a majem." Khristan-a masü alima nebür-a masü, tanga yimsü amangera masü, Yisui sayuba tsüngsü nunga manidaktet. Khristan taküm kong lir sarasadema shisadangi.

# Bangladesh nung Liebenzeller Mission Intl' küm 50 jungogo



Bangladesh nung Liebenzeller Mission International küm 50 ajungbamong amongdang Bangladesh nung partner Arogoi Liebenzeller Mission nungi Dave Jarsetz (abelen) aser Daniel Mattmüller na dang pelaba temaitsü sayua honorary plates agütsüdang tangokba noksa nung angur.

**January 24, 2025:** Liebenzeller Mission International-i küm 50 tashi Bangladesh nung Arogo 350 yaria aruba sülen küm 50 ajungbamong nungtem nung sentong aika ayongzüka kaogo.

Bangladesh nung Liebenzeller Mission International küm 50 ajungbamong amongdang Bangladesh nung partner Arogoi Liebenzeller Mission nungi Dave Jarsetz aser Daniel Mattmüller na dang pelaba temaitsü sayua honorary plates agütsü.

Liebenzeller Mission International-i küm 50 tashi Bangladesh Baptist Church Sangha (BBCS) den senteper Khrista osangtajung prokba nung shilem agia aruogo.

BBCS ya Bangladesh kübok district 10 nung Arogo 350, pastor 150 aser züngsem 20,000 densema aliba network ka lir.

Liebenzeller Mission küm 50 ajungba sentongtem nung tejaoker 800 dak tali aden. Parnok rongnung taoba mapang missionary tem aser

Daniel Mattmüller densema tang teinyakdak missionary tem aika densema liasü.

Daniel Mattmüller ya Liebenzeller Mission kübok Central & South Asia department nung tongti lir. Taoba mapang iba mission nung lenirtem- Michael Kestner, Waldemar Lies aser Samuel Straub nungera item sentong nung aden.

Missionary Benedikt Tschauner-i, "Tesüiba küm 50 tashi amalitepa inyaka arudang Tsüngrem adenba aser Pai moatsübatem onoki aika ajangshio. Tarutsü nung mission mapa tasen atema asalentong renemogo," ta metetdaksü.

Bangladesh nung Arogo indang network tulutibatam rongnung BBCS densema lir. Nüngtugu missionary, William Carey-i tama Bangladesh nung mission tera yangja liasü.

"Modern mission tebuti," ta ajasang, William Carey-i 1793 küm 'East Pakistan' (tang Bangladesh) nung mission mapa tenzüka liasü, aser iba mapang nungjagi tenzüka England nung aliba Baptist Missionary Society teyaritap aser tribal Arogotem ajanga

iba network kanga inogo.

1974 küm nungi Liebenzeller Mission-i Bangladesh nung mission mapa tenzüka liasü. Iba kümji missionary Albert aser Marianne Rechkemmer na den missionary sisters- Charlotte Anders aser Gertrud Endlich nungeri state hospital ka nung medical teyari agüja mission mapa tenzüka. Missionary tetsürtem jagi X-ray machine amshia liasü.

Mission küm 50 ajungba nungtem nung Bangladesh yimtiba, Dhaka nungi kilometer 250 shi pilar aliba Khulna nunga sentong ayongzüka agi; iba sülen anogo ananü national pastors' conference nung pastor 200 shi aden.

Iba sentong nung Albert Rechkemmer-i züluba kaket 'Just Do It' Bengali oshi nung adokba kaket sayaa liasü. Iba kaket nungji Albert-i pa küm 4 Bangladesh nung missionary mapa inyaktang pai ajangshibatam zülua lir.

Dinajpur nunga Liebenzeller Mission-i yimtsüng ka nung sentong ayongzüka among. Iba yimdakji mission-i kaketshirtem atema boarding school ka lapoka lir.

Tanü-a Liebenzeller Mission-i Bangladesh nung maneni theological studies yariba den nübür tenzüka mapa inyaker aser training agütsür.

Nütsüng million 169.5 aliba Bangladesh ya Muslim nütsüng teimba aliba linük ka lir. Iba linük nung Khristan nütsüngbo 950,000 (shilem 0.6) dang lir.

Bangladesh nung Khristan yimsü dangi meyipertem, talisa tribal Khristantem nem tenokdangba balala agütsür.

Khristan melungtet telok Open Doors-i ashiba agi, iba linük nung Khristantem anema inyaker, ibayongji nisung aikati house churches nung dang tekülem sentong agir.

2023 küm nunga Chittagong Hill Tracts region nung tribal Khristan 8 tepseta liasü.

Bangladesh nung Liebenzeller Mission aser BBCS nati küm 50 tashi longjemer Tsüngremer wadang inyaktetbaji ajanga missionary temi kanga meranga inyakba aser reshikangshi liaka Khristantemi ajak tizükteta aliba kuli sayur.



**AO OSHI ANGAZÜKDAK:**

**TANÜ ANGAZÜKTSÜBA OJANG**



**Tebo**

(n) kum nung tambui tanubur dang ajaba (younger one)

\* Kübui kü dang tebo ta dang ajar.

**Tebosang**

(n) taini tanur dang ajaba (younger boy)

\* Küti nungertemi kü dang tebosang ta ajar.

**OLONG PAITEP # 7045**

1		2		3		4	5		
				6					7
		8							
9				10		11			
			12					13	
						14			
16						17			

**TIPIEN**

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S\_\_\_i - (3)
- 9. Nisung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizingdak - (3)
- 14. Tebang nungi adokba - (3)
- 16. Süngdong tatembangliba - (5)
- 17. Meputep - (5)

**LANGTSÜNGLEN**

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Majinü - (5)
- 13. Tzüma nung senzüba - (5)

**OLONG PAITEP # 7044 TELANGZÜBA**

**TIPIEN :**

- 1. Telok, 4. Aluru, 6. Ozüng,
- 8. Emk, 9. Kin, 10. Teti,
- 12. Süir, 13. Jen, 14. Ola,
- 16. Talak, 17. Mazük.

**LANGTSÜNGLEN :**

- 1. Tenükjang, 2. Luden,
- 3. Kiochtsü, 5. Lenti, 7. Tajangzük,
- 11. Teronem, 12. Sempa,
- 13. Jahaz.

**NAI-A YA METETTER MA**



Canadian photographer Steven Haining-i "deepest underwater model photoshoot" atema Guinness World Record tasen ka yanglutetogo. Boca Raton, Florida, USA nung Hydro Atlantic shipwreck 50 metres (163.38 ft) telung nung pai iba photoshoot agia liasü.

Haining-isa June 2021 nung 21 feet aser September 2023 nung 30 metres tzü telung nung ia noka agiba atema otsütem yangluteta liasü ajisüaka Canada nunger ana- Kim Bruneau aser Pia Oyarzun nati December 2023 nung Haining indang otsü ajatet. Kim aser Pia nati Bahamas nung tzü telunglen 131 feet ia photoshoot agi saka tang Haining-i ibaji ajatetogo.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

**Meghalaya nung Bangladeshi nunger 6 apu**

**Guwahati, January 24, 2025**

(Agencies): East Jaintia Hills, Meghalaya nung Border Security Force (BSF)-i Bangladeshi nunger ta temlung melemi bilemer nisung 6 apu.

172 Battalion nungi BSF sepaitemi taitüsü keta repringba agi mita aodang nisung telok ka apu.

Parnok ya arishi küm 26 tain Shilpi den lar tanur asem, arishi küm 23 tain Rumana aser lar jabaso nunger lir.

Parnok ya ita ishika tejaklen ozüing alema India telungi ait aser Bangalore nung kidang yariteperitem ama inyaka liasü. Ajisüaka parnok Bangladesh-i meyipa merandang apu.

BSF sepaitemi parnok ajak Umkiang police patrol post ket nung agütsüogo.

BSF-i India-Bangladesh arrtsülen anogo 10 nü atema "Ops Alert" exercise tenzüka agidang parnok apu. Republic Day amongtsü aliba dak rangloker BSF-i iba maparen tenzüka liasü.

**Guwahati, January 24, 2025**

(Agencies): Mizoram nung Zo Re-Unification Organization (ZORO) ajanga January 29 nü lungkak aitba sentong ka agitsü metetdaksüogo.

Free Movement Regime (FMR) agienba aser Indo-Myanmar Border (IMB) arrtsü atsüdangba anema ZORO-i Centre aser state sorkartem anema lungkak aittsü.

ZORO-i India, Myanmar, aser Bangladesh nung aliba Zo kintem longjemtsü alizüing yua



**IndianOil**



Marketing Division – Eastern Regional Office

APPRENTICES ACT 1961 KÜBOK APPRENTICES SHIMTSÜ ATEMA SANGDONGER

Indian Oil, Marketing Division, Eastern Region ajanga States of India (West Bengal, Odisha, Bihar, Jharkhand, Assam, Sikkim, UT of Andaman & Nicobar Island, Tripura, Nagaland, Mizoram, Meghalaya, Manipur & Arunachal Pradesh) nung Technician, Graduate & Trade Apprentices (Technical and Non-Technical) apperentices 397 shimtsü atema applications meshir.

Advertisement tejangja den arishi küm, qualification amala eligibility criteria aser stipend, relaxations, concessions, reservations amala osang tejangja onok indang corporate websites www.iocl.com or at https://iocl.com/apprenticeships nung agüja lir.

\* Koma apply asütsü: Jangra aliba candidates shirnok eligibility criteria nung temsüa aser NATS (For Diploma and Graduates)/NAPS (For ITI and Data Entry Operator-Freshers/Skilled Certificate holder) apprenticeship portal nung register süa lir, parnoki online nung NATS/NAPS portal ajanga 24.01.2025 anepdang 10:00 ako nungi tenzüka apply sütettsü. Application online agütsüba ya 14.2.2025 nikongdang 5:00 ako nung shibangtsü.

Iba sülen sangdong/temelenshi ajak onok corporate website www.iocl.com kisung nung agütsütsü.

Note: Apprentices nem regular employment agütsütsü Corporation mapa masü. Kodanga Apprenticeship nung ajemdaker Apprentices ajanga Corporation nungi regular employment memeshitsüla. Apprentice nem mapa agütsütsü asoshi Indian Oil nem khuret magütsütsüla.

Advertisement No.: IOCL/MKTG/ER/APPR/2024-25

**ZORO-i Free Movement Regime agienba anema lungkak aittsü**

asir iba ya linük anaprong nung aliba Mizo nunger ajemshiba lir" ta pai ashi.

"ZORO-i FMR agienba aser arrtsü atsüdangba anema maneni noktaksü. Iba ya UN Declaration on the Rights of Indigenous Peoples 2007 nung Article 36(1) anema lir" ta Lalramsanga-isa ashi.

India sorkari iba article anema noktaksa aitsür kechiyong tesüiba nungbo parnoki UN nung iba ya pusema liasü ta Lalramsanga-isa metetdaksü.

"FMR ajanga arrtsülen kilometre 16 telongtet nung alirtem passport melii dang senzüsenbonga aru aser iba ajanga India aser Myanmar nung aliba Mizo nunger tesentaktep akangshitepa liasü" ta ZORO President Michael Lalramsanga-i ashi.

"Sorkari border pass ka amshitsü lemtetba magizüker

**Garo Hills NGOs-i nakmati anema ola adoker**

**Guwahati, January 24, 2025**

(Agencies): Commission on coal transport nung chairperson Justice (retd) BP Katakey-i Garo Hills, Meghalaya nung ozüing alema nakmati belenba maparen bushisüngdangtsü ayongzüker ta All Sellsella NGOs' Alliance-i metetdaksüogo.

Balal Adugre aser Goeragre ajanga ozüing alema nakmati

belener aser iba ajanga alima raksaba dang masü nübertem nem lendong bentsür arur, ta parnoki ashi.

Sellsella-Garobhada road nung ammanng nung ozüing alema maparen inyaksangshir ta All Sellsella NGOs' Alliance-isa tai tongoktsüogo.

Justice Katakey-i iba lenmang nung police mapa

lemzükja iba maparen anendaksütsü mepishir. Iba maparen ya environmental regulations alema inyaker aser local ecosystem o infrastructure nung teraksa bentsür arur, ta parnokisa ashi. Iba tesem nung ozüing alema nakmati talila abenba truck garitem kanga senzür aser gari lenmanga raksatsür.



Indian army aser Manipur police-i Manipur-Assam arrtsülen joint operations inyaka arudang tesepe pezü makdok aser prangpong-injang aika ngutetogo. Parnoki Manipur kübok Jiribam district nung Zairol aser Uchathol anasa arem nung mita ao aser iba tesem ya Assam kübok Cachar district den arrtsütepa lir.



# Trump-i JFK, RFK aser MLK nunger tepsetba files ajak sayatsü tuyu

**Washington, Aenjeti/January 24 (Agencies):** Taoba US tir John F Kennedy tepsetba dak sendakba files tanungba ajak temai adoka sayatsü United States Tir Donald Trump-i totuyuba agütsüogo, koba küm 60 shi miim ken o ka liasü.

Trump-i Brehostibarnü executive order agütsüba nungsa JFK tenu Robert F Kennedy tepsetba aser civil rights icon Martin Luther King Jr tepsetba dak sendakba records tanungba ajak sayatsü shia liasü.

"Ibai mera tulu lir. Nisung aika ibai küm aika ataa liasü. Aser ajak temai adoktsütsü," ta Trump-i White House nung iba totuyuba nung meyongnem agütsüdag ashi.

Trump totuyuba kübok national intelligence indang director-i anogo 15 tsüngta JFK tepsetba dak sendakba files ajunga sayatsü asoshi sentong yanglur agütsütsü aser dangar ana tepsetba dak sendakba documents sayatsü asoshi anogo 45 tsüngta sentong ka yanglur agütsütsü.

Dallas, Texas nung November 22, 1963 nung JFK tepsetba ajanga America nunger küm aika aoksadakja aru aser pa tepsetba indang ketdangsür temi rasaa ashiba nung tamang makaba survey tem ajanga sayur.

2023 küm Gallup poll nung America nunger shilem 65-i JFK tepsetba nung US Marine veteran Lee Harvey Oswald kisingi tir tepset ta Warren Commission ajanga bushitetba nung mamanger ta ashi.

Shilem 20-ibo Oswald-i

US sorkar den tasa yanglu ta amanger ta ashi aser shilem 16-i pa CIA den inyaka liasü ta amanger ta ashi.

Trump indang health secretary inyaksü shima alisang aser Robert F Kennedy'er jabaso Robert F Kennedy Jr-i 2023 küm sensaksem sentong ka nung, pa tebutambo tepsetba nung CIA shilem aliba kuli peria lir aser pa tebu asüba nung itdangiterba agency dena aliba "circumstantial" evidence lir ta shia liasü.

Oval Office nung iba totuyuba nung meyongnem agütsüba sülen Trump-i yangji amshiba pen ya pa den yariteper ka nung amoktsür "Ibaji RFK Jr nem agüjang," ta ashi.

Trump-i iba totuyuba agütsüba aija JFK'er semchir Jack Schlossberg-i ashiba agi, pa tebou asüba ya "inevitable grand scheme" nung shilem ka masü ta ashi.

"Yimten ajangzüktsü mechi JFK ken o temai adoktsü amshir, kong meyiper telangzüba agütsütsüsa pa yangi mali. Yangji nüburtemi tushitsü kecha mali," ta Vogue magazine atema political correspondent ama inyaker Schlossberg-i ashi.

1992 küm US Congress ajanga ozüng ka agizükba nung iba ken o temai adoktsüba ajanga nüburtem tejangraba dang nungi national security nung timtem agütsüba tuluba ta tiri mejangjatetra JFK tepsetba dak sendakba nung tanungba files tem ya küm 25 tsüngta sayatsüla ta shia liasü.

# Israel nunger chioktsüpur Hamas-i sangdongtsü

**Gaza City, Aenjeti/January 24 (Agencies):** Gaza ceasefire tezüngzükteper kübok pua alir nisung pezü Honibarnü chioktsü tenüngtem Hamas-i Israel nem agütsütsü imlar.

Parnok ya sepai aser civilian tem aser ajak tetsür asütsü südi ta bilemer. Parnok ya Israel nunger tepuokdak yua aliba Palestine nunger nisung 180 melen chioktsü.

Ibai taoba Deobarnü nungi ceasefire tenzüker tepuokdak alirtem melentepba tanabuba alitsü. Mezüngbuba nung pua alir asem aser tepuokdak yua alir nisung 90 melentepa liasü.

October 7, 2023 nü Hamas-i Israel amakba ajanga tenzükbura ya iba ceasefire ajanga anendakja lir. Iba mapang Hamas teloki Israel nunger nisung 1,200 shi tepset aser nisung 251 ano Gaza-i pua bener ao.

Israel-i meyiper amakba nung civilian tem timba süir Palestine nunger nisung 47,200 dak tema tepsetogo, ta Gaza nung Hamas meyong health ministry ajanga ashir.

Hamas-i ano hopta pongu tsüngta chioktsü aliba tanungba hostage 26 indang osang ya agütsütsü imlar.

Yangji Bibas kibong dena lir - kong tsürabor ana den tanur

ana, kaji ita 10 kinü tanur Kfir, shiba pua bener aortem rongnung tanubosang lir. Parnoki osang agütsüba nungya tenüng mesüra takum alirtem mesüra süir alirtem adentsü asi masüar mejangja.

Tang Israel nunger tepuokdak nungi chioktsü alirtem ya mezüng melenteper dang category balaka nung

alirtem lir. Item rongnung nisung tepseter, karbo tepuokdak küm 15 dak tali alirtem dena lir.

Israel-i October 7 nü amakdang dena alir kata mechioktsü ta ashir. US, Qatar aser Egypt-i anir Israel aser Hamas tsüngta yimjung ken o ita aika jembia aruba sülen iba ceasefire ya sangdong.

## Menungra Bilemteter

### OJALA ALEMLILA



Aso:1938 - Asü:25.01.2024

Temeim ojalai iba lima toktsür küm ka ajungba anogo nung tanü onoki la menungra bilemteter. Lai onok dang Tsüngrem den jajatsü sayuba, la temeim mapatem aser sayubentsü o taroktem onoki kodanga mamatsü. La tanü onok den meliaka lai toktsüba maongka nung onok kenüa-mati Tsüngrem tenüng sanga jajar.

Teti dang meima aliba Chirnur aser Semchir

### ALI TAYOKTSÜ LIR

1. Old Showuba nung, 12397 Sqft. Four lane, fly over anasa.
  2. Rs. 50 per Sqft. Aginüba tasazük angutsü.
  3. (5 Pura) 1 Pura - 3,200,000/-
- Contact : 9863826159.

# Acknowledgment



**Lt. IMKONGYANGER PONGEN**  
(MANGMETONG)  
13.01.1957 - 18.01.2025

We, the family of **Lt. IMKONGYANGER PONGEN** would like to express our profound gratitude to all those who have shown us love, support and kindness following our sad loss. We are deeply thankful for the heartfelt condolences, thoughtful prayers and the time and energy many of you dedicated to being with us. The warmth and compassion we have received during this difficult time have been a great comfort.

- We would also like to thank and appreciate;
1. Dr. Aoakhum Kichu, MD, Eden Hospital, Dimapur
  2. Mangmetong Union, Kohima
  3. Mangmetong Yimpang Pongener Kidong Telongjem, Kohima
  4. Mangmetong Baptist Arogo
  5. Mangmetong Pongen Kidong Telongjem, Mangmetong
  6. Kohima Ao Baptist Arogo Lerie Fellowship
  7. Kohima Longjang Fellowship
  8. Aoyimsen Baptist Arogo

*While our hearts remain heavy with sorrow, knowing we are surrounded by such caring people gives us strength. Thank you for your continued love and prayers.*

*With sincere gratitude,*

Daughter, Son-in-law, Grandchildren & Loved Ones

## 2025

### AO TESAYURTEM ANGAZÜKSHIYIM SENTONG

Anogo	: Aenjeti 29
Tesem	: Ao Senden Conference Hall
Mapang	: Anepdang 10 ako nungi
Menden	: Wt. Yongthangnaro
10:00-10:15 Sentong Rajem	: Rev. Prof . Rongsen Lkr Mendenbuba, Ao Riju
10:15-10:30 Ao Oshi Sungkhüm	: Wb. Marsanen Imsong Tir, Ao Senden
10:30-11:30	: "Oshi Ka Sama-a Aodang Wazüka Ayutsü Lenpi" Prof. Pangersenla, NU, Meriema, Kohima
11:30-12:00 Süngejem Mapang	
12:00-1:00	: "Ao Oshi Nung Tesayurtem Wadangtep" Wb. I.Temjen Tzüdir, Ao Riju
1:00-2:00	: Onük ajak nung apijemtep mapang
2:00-2:30	: Kulikaket agütsüba mapang
2:30-	Pokmen mapang

#### TEMETETSÜ:

1. Iba sentong nung Govt. aser Private School-tem, Class 9-12 nung Ao tesayurtem ajak kangtepa arua adentsüla, kar yimkongi meteta timtemba ajanga medentetsüsa kümra anogo jelia Ao Riju office nung (7085914530 aser 9089816427) osang agütsütsü metetdaksür.
2. Tarur ajak nem notebook aser pen agütsütsü.

Sd/-  
Prof. Rev. Rongsen  
Chairman

(S. Wati Ozüküm)  
Secretary



# Sinner aser Zverev final asayatsü; Peers-Gadecki nati tarep temeyoktep akok



Jannik Sinner



Alexander Zverev



## AUSTRALIAN OPEN

**Melbourne, Aenjeti/January 24 (Agencies):** Melbourne nung defending champion Jannik Sinner-i straight sets nung Ben Shelton madak takok anguba sülen Alexander Zverev den Australian Open final asayatsü.

World number one Sinner-i Rod Laver Arena nung America nung Shelton madak 7-6 (7-2) 6-2 6-2 agi takok angu, kong pai ita 12 tejakdang mezüngbuba asayamung tulu takok marok ngua liasü.

Hokulbarnü semi-final asaya danga ka nung Novak Djokovic mezüng set nung tamakok ajurur lia yiruba ajanga asaya nungi anisüngzüksüsa akum aser world number two Zverev nem takok agütsü.

Taoba finals ana nung tamakok ajuruba sülen Zverev ya tang tashi asayamung tulu nung mezüng takok angutsü meranga asayar aser Deobarnü final nung pai form nung alisang Sinner ajurutsü.

Iba asayamung anaben defending champion Aryana Sabalenka aser Madison Keys tsüngta tetsür kija final Honibarnü asayatsü.

Tang US Open champion bena alisang Sinner ya 1993 küm Jim Courier sülen Australian Open finals anaben tongteter teburtem rongnung tanubosang kumogo.

Italy nung Sinner ya tesüiba ita 12 tsüngta asayamung timba nung takok ngua arur aser taoba küm October 2 nü asaya ka nung tamakok ajuruba sülen pai asaya 20 nung ashidena takok nguyonga arua taküm Australian Open final atonger.

Tang mezüng major final atongtsü merangsang arishi küm 22 tain Shelton-i iba asaya mezüng game nung bo kanga junga asayatet, saka tanüngba set ana nung unforced errors aika ajurua liasü.

Tematiba jenjang nung alisang-i sets ana nung takok ngur aliba tsükdaktsütsü teimla

kangabo meliaka Shelton-i terepranger tezü metangdaksüi asaya liasü.

Tena tsüngta asaya ya ghonda ana ser minute 36 agia liasü.

Sinner ya nokdanga aliba mozü agiba ken o tang tejembidak lia Australian Open title defence ya asayatsüsa akumer, koba April 16 nü nungi Court of Arbitration for Sport nung jembitsü aser World Anti-Doping Agency-i küm ka mesüra ana nokdangtsü tebilemba lir.

Kasa asayamung nung Novak Djokovic ya Alexander Zverev den semi-final asayadang yiruba ajanga anisüngzüksüsa akum aser pa court nungi aodang Australian Open fans kari boa liasü.

Djokovic ya iba asayamung title 11 buba angutsü teimla liasü, saka minute 80 buba nung 7-6 (7-5) agi tamakok ngur asaya nungi anen.

Arishi küm 37 tain Serbia nungba ya Mongulbarnü Carlos

Alcaraz madak takok anguba quarter-final nung yiruba sülen tetsüng abelen aleper liasü.

"Ni yiruba akok tashi anepaludangogo. Mezüng set tatemlen tali ango tenzük. Aser ni maremtetsüsa akum," ta major titles 25 angutsü nükjidong alisang Djokovic-i ashi.

Set point nung net nung zükloktsüba sülen seed tenet buba nung alisang Djokovic-i kanga kera Zverev dangi oa salema liasü.

Pai terepranger dak teka ayiploksü aser teka kumtsüba ana sayu, saka Rod Laver Arena nungi kari bolokja liasü.

Serbian media ajanga Djokovic dang iba indang astüngdang dang, "Nia kechi ashijar memetet. Asaya tajung asayatsü imlaa nüburtet sen agi ticket alir aru," ta ashi.

"Ibaji ni angateter. Ni parnok angatetsü asoshi tajungtiba inyaker, saka parnokia ni angateter asü masüar memetet," ta pai ashi.

**Melbourne, Aenjeti/January 24 (Agencies):** Hokulbarnü Melbourne Park nung Australian Open 2025 tarep temeyoktep final nung Australia nung Olivia Gadecki aser John Peers nati set ka nung tamakok ajururaka asendenshir asayaa külem linük nungi Kimberly Birrell aser John-Patrick Smith na madak 3-6, 6-4, 10-6 agi takok ngua liasü.

Rod Laver Arena nung asayaba mezüng set nung Birrell aser Smith na 3-0 agi temaba jenjang nung liasü, aser kanga süngjema asaya 5-2 akum aser minute 34 buba nung iba set ya agi.

Tanabuba set nung Gadecki aser Peers nati asendenshir asaya aser 10-point tiebreaker nung takok angu.

Ibai Gadecki asoshi Grand Slam ka nung tarep temeyoktep takok marok mezüngbuba alitsü, saka Peers asoshi ibai tanabuba alitsü, kechiaser pai 2022 US Open nunga kasa category nung takok ngua liasü.

## ICC Women's ODI Team of the Year nung Smriti, Deepti na lir

**Dubai, Aenjeti/January 24 (Agencies):** Hokulbarnü ICC Women's ODI Team of the Year 2024 sangdongba nung India tsür Smriti Mandhana aser Deepti Sharma lir, saka tebur indang nungbo India nung kata mali, koba Sri Lanka, Pakistan aser Afghanistan nungeri sünga lir.

Tetsürtem team nungya England nungi asayar asem, Australia nungi ana, South Africa tsür ana, Sri Lanka aser West Indies nungi ka-ka aser India tsür ana ya lir. South African batter Laura Wolvaardt, shibai 2024 küm matches 12 nungi runs 697 ngutet, la ya ICC team indang captain nungja agütsü.

Saka India nung teburtem ICC XI nung kata mali, aser ibai talisa taoba küm India asoshi ODI asaya kangabo maliba yong alitsü. India-i ODIs asem dang asaya – Sri Lanka den away series – kong anaben tamakok ajuru aser tasembuba tie nung

tembang.

Arishi küm 28 tain Mandhana-i asaya 13 nung runs 747 nguteta 2024 küm tetsür ODIs nung run timba nguteter liasü. La ya ano ICC Women's ODI Cricketer of the Year awards nunga shimoka lir.

South Africa den home series asayadang Mandhana ya form nung liasü aser mezüngbuba ODI ana nung atonga century yanglutet. Tasembuba asaya nung lai runs 90 yanglutet aser iba asayamung nung lai runs 343 yanglutetba yong Player of the Series award ngua liasü.

Mandhana ya October ita New Zealand den mezüng ODI ana junga masayateti tenzük, saka final nung lai century yangluteta tembang. Iba century ajanga Mandhana ya India tsür 50 over format nung "most prolific century-maker" akum.

Deepti-i 2024 küm asaya 13 nung runs 186 yanglutet

asir wickets 24 agia liasü.

ICC ajanga sangdongba tebur all-star ODI team nung Sri Lanka nungi asayar pezü, Pakistan aser Afghanistan nungi asem-sem aser West Indies nungi ka lir.

Sri Lanka captain Charith Asalanka ya ICC team indang skipper shim.

2024 küm pai ODI 16 asayaba nung runs 605 yangluteta average 50.2 liasü aser yangji century ka aser century tesadang pezü liasü.

Taoba küm Sri Lanka-i ODIs 18 asaya, aser 12 nung takok angu.

Kasa mapang Pakistan-i ODI toku asayaba nungi tenet nung takok angu aser Afghanistan-i ODI 14 asayaba nungi ti nung takok ngua liasü.

2023 küm international sapang nung mezüng asayasang West Indies nung Sherfane Rutherford kisüng Asia nungi masü, shibai asaya toku nungi runs 425 yangluteta liasü.

## Germany coach Julian Nagelsmann contract Euro 2028 tashi atsülang

**Berlin, Aenjeti/January 24 (Agencies):** Julian Nagelsmann ya Germany indang head coach ama 2028 European Championship tashi alitsü contract atsülangogo, ta German Football Association (DFB) ajanga Hokulbarnü sangdong.

Germany-i ayongzükba Euro 2024 nung ajangshiba ajanga pa 2026 World Cup aser küm ana lir Euro Cup tashi alitsü mesüzük, ta Nagelsmann-i ashi.

"Asenok lenmang shidak nung lir aser ano metembang. Asenoki maneni renlokner. Asenoki titles nguner," ta arishi küm 37 tain Nagelsmann-i sangdong ka nung ashi.

Taoba mapang Bayern

Munich coach inyaka alisangi German national team indang mapa ya September 2023 nung agizük, koba mezüngbu taoba küm Euro Cup asoshi dang liasü.

Nagelsmann lenisüba nung Germany-i asaya 19 nungi 11 nung takok ngua lir, aser March ita Italy den Nations League quarterfinals asayatsü lia asaya trok tashinung tamakok majurui lir.

"Ni asen linük nung Euro asayadang national team coach asütsüba dak alia mebilemi liasü. Asen nükjidongji asayamung takok ka asoshi liasü. Ajisüaka Germany nung aliba nüburtet national team meimba ni meblem," ta Nagelsmann-i 2023 küm ashi.

## BILEMDANGANG

"Kong nisung lir, yangji temeim sayutsü maongka angur."